

大慧童女者豈異人乎即今妙吉祥菩薩摩訶薩是彼王所有千童子衆今已成就阿耨多羅三藐三菩提果現住說法教化衆生即千佛是所謂

東方超過行如來無邊光明如來普光如來吉祥主如來寶相如來寶上如來寶明如來

寶幢如來寶照明如來

南方最極高如來大光明如來無量壽如來無量聲如來大名稱如來無邊名稱如來寶光如來清淨無邊壽如來月相如來月光如來西方無垢明如來清淨光如來日明如來無邊寶最上如來梵高如來金色光明如來梵

自在王如來龍自在王如來一切寶華自在王如來娑羅樹王如來

此方堅固勇猛如來離塵如來吉祥藏光如來無量香光如來師子音王如來大勢力精進出生如來妙高步如來大寶聚如來不退轉輪如來寶句義吉祥如來普徧大日如來

勝得如來如是等諸佛如來種種名字現在十方世界說法教化衆生

佛告普華幢天子言如汝所問此妙吉祥菩薩摩訶薩於彼金焰光明世界無垢日焰光明佛所最初發於阿耨多羅三藐三菩提心
九末

佛說大乘不思議神通境界經卷中 駕六

佛說大乘不思議神通境界經卷下

西天譯經三藏朝奉大德光祿卿傳法大師賜紫室施護奉 詔譯

佛告天子此妙吉祥菩薩從是已後復於七十二瓊伽沙數佛世尊所發菩提心最初有佛名尸隣捺囉王如來應供正等正覺出現世間於彼佛所發菩提心其後有佛名寶光

行吉祥出現世間其後有佛名蓮華上變化
吉祥出現世間其後有佛名清淨寶吉祥出
現世間其後有佛名無邊寶吉祥出現世間
其後有佛名大寶吉祥出現世間其後有佛
名虛空燈出現世間其後有佛名大法王出
現世間其後有佛名衆寶聚持妙色相出現

世間其後有佛名能仁主出現世間其後有
佛名功德光明莊嚴吉祥出現世間其後有
佛名大光吉祥出現世間其後有佛名無量
光廣大莊嚴出現世間其後有佛名作變化
雲千音聲王出現世間其後有佛名最上日
光吉祥出現世間其後有佛名最上意出現

世間其後有佛名多種光明吉祥王出現世
間如是等七十二殑伽沙數佛世尊所發菩
提心已復於九十一劫中值遇諸佛發菩提
心又復於火頂如來衆尊如來作莊嚴如來
飲光如來是諸如來所皆發菩提心種諸善
根天子此妙吉祥菩薩能於如是無量無數

佛世尊所發菩提心廣大方便種諸善根已
乃至最後於我現在如來應供正等正覺所
以神通變化作諸佛事

爾時普華幢天子前白佛言世尊一切衆生
欲種善根若能於此廣大正法發信解心聽
受讀誦記念思惟爲人演說當知是人善得

人身善見諸佛善聞正法於其世間有所利
益不空受食世尊而諸衆生云何當能於此
正法發生信解

佛告普華幢天子言汝今宜應以如是事問
妙吉祥菩薩彼當爲汝如理宣說是時普華
幢天子即白妙吉祥菩薩言云何當得一切

衆生於此正法能生信解妙吉祥菩薩言天
子無有法可生信解彼一切法自性空故無
所生故若法自性空無所生當復云何而生
信解

普華幢天子復白妙吉祥菩薩言願爲我等
略說菩薩行法妙吉祥言天子當知無行是

菩薩行又復一切法是菩薩行普華幢天子言云何一切法是菩薩行妙吉祥菩薩言天子當知所言一切法者謂四念處八正道五根五力七覺支略說此等為菩薩行若廣說者其數無量諸菩薩摩訶薩若得此法是即名為真菩薩行

普華幢天子白妙吉祥菩薩言云何名為四念處妙吉祥言天子若菩薩觀身如虛空不得身相住平等法如是名為身中身念處若菩薩觀諸受法內外中間俱不可得皆悉空故如是名為觀受念處若菩薩如實觀心於其名中無已可見即不可得所觀心相如是

名為心中心念處若菩薩如實了知彼一切法若善不善自性皆空如是名為法中法念處天子此等名為四念處法

復次普華幢天子白妙吉祥菩薩言云何名為八正道法妙吉祥菩薩言若菩薩觀一切法非境界相無二無分別無少法可取是名

正見若菩薩觀一切法離諸分別及諸疑惑與無所觀正行相應是名正思惟若菩薩觀一切法自性真實非有邊非無邊皆悉平等如實宣說是名正語若菩薩觀一切法離所作性而不可得若如所作若非所作皆悉平等住如實義是名正業若菩薩知一切法本

不相續即於諸法無瞋無喜亦無所著安住真實平等法中是名正命若菩薩了一切法無諸起作離種種相於精進行如實相應是名正精進若菩薩於一切法不起諸念了知諸業自性清淨住無所念是名正念若菩薩入一切法自性平等於所緣相皆悉遠離畢

竟觀察了不可得是名正定天子此等名為八正道法

復次普華幢天子白妙吉祥菩薩言云何名為五根妙吉祥言若菩薩了一切法本無所生自性真實無進無退平等法中如實信解是名信根若菩薩於一切法心無愛樂離遠

近想住真實性是名精進根若菩薩於一切法非所作意以所緣相離種種性由性離故諸念不生是名念根若菩薩於一切法無所念無所得正定相應是名定根若菩薩於一切法離所生相及不生相諦觀諸法自性皆空是名慧根天子此等名爲五根

復次普華幢天子白妙吉祥菩薩言云何名爲五力妙吉祥言若菩薩於一切法不起種種虛妄分別是名信力若菩薩於一切法而能請問如實勝義名精進力若菩薩於一切法離諸失念正念相應是名念力若菩薩於出世法心無懈怠是名定力若菩薩於諸業報淨信不壞是名慧力天子此等名爲五力復次普華幢天子白妙吉祥菩薩言云何名爲七覺支妙吉祥言若菩薩了一切行本無所生於喜樂法觀真實性是名喜覺支若菩薩於一切法無愛著心於所緣相觀不可得是名輕安覺支若菩薩見一切法自性無念

無所作意是名念覺支若菩薩於一切法求種種相了不可得記諸善法如實出生是名擇法覺支若菩薩觀三界性不取三界相是名精進覺支若菩薩觀心無所得即於一切法亦無所覺了是名定覺支若菩薩知一切法本無所依即無所住復無所生亦無所覺

是故一切法無所觀不可得住平等捨是名捨覺支天子此等名爲七覺支法如是略說四念處八正道五根五力七覺支法此諸法門若菩薩所修爲菩薩行聲聞所修爲聲聞行假使若有淨行諸婆羅門能修習者即得解諸怨結除滅棘刺息諸煩惱遠離病苦不生怖畏順向佛道住佛種姓若諸沙門多聞佛子修此法者即得超越輪迴到於彼岸離諸塵垢得無相身去除重擔到無畏處獲大快樂若諸菩薩於此法門如實觀想如理修行得具足已是諸菩薩於天上人間應受廣大信施供養天子是故諸菩薩於

其世間隨諸方處不空受食有大利益又復若欲出度輪迴破諸魔衆摧伏外道吹大法螺擊大法鼓轉大法輪立大法幢解脫衆苦得大涅槃當於如是勝妙法門如理修行天子汝前所問菩薩行者此一切法是菩薩行

爾時妙吉祥菩薩摩訶薩爲普華幢天子說是法時會中有三萬二千天子聞已信解住法平等即時雨天曼陀羅華摩訶曼陀羅華及衆妙花住虛空中供養世尊及妙吉祥菩薩花供養已作如是言我等今者於佛法中暫得聞此菩薩行法尚獲如是最勝利益況復有人於此正法能一心聽生淨信解如理

修行當知是人順向佛道如妙吉祥神通具足
爾時普華幢天子復白佛言世尊今此正法於後末世欲使廣大宣通流布唯願世尊以威神力加持護念佛告普華幢天子言如是如是諸佛如來而自知時

爾時世尊普徧觀察諸衆會已作如是言諸善男子汝等衆中誰當能於無數百千俱胝那庾多劫持佛菩提護助正法
爾時會中有三十二俱胝大菩薩衆異口同音俱白佛言世尊我等於佛住世及涅槃後以佛神力而能持佛菩提護助正法

復次會中有梵天子名勝思惟從座而起前白佛言世尊諸菩薩摩訶薩於何福蘊修習具足當能於此甚深正法受持讀誦爲人演說廣大流布佛告勝思惟梵天子言若菩薩摩訶薩於佛如來所有十力修習具足勇猛堅固證得無生法忍者當知是人即能持佛

菩提護助正法

爾時勝思惟梵天子復白佛言世尊如我解佛所說義今此不思議境界正法若有人聞不能發生清淨信解者我知是人非爲大士於正法門而不相應是故世尊不爲授記
佛言梵天子如汝所說如是如是

尔時慈氏菩薩摩訶薩從他方界遠來佛會與妙吉祥菩薩摩訶薩俱白佛言世尊今此正法於後五百歲中唯願世尊以威神力加持護念使令正法廣大流布於其世間利益安樂一切衆生而諸魔衆欲生破壞不得其便

尔時世尊當欲加持護念此正法故於其左右重複觀察一切衆會即時十方如琬伽沙數所有佛刹六種震動而彼十方如琬伽沙數現住說法諸佛世尊知是事已亦各以其神力加持護念此正法門
尔時帝釋天主前白佛言希有世尊今此甚

深不可思議境界正法諸佛如來神通威力所加持故世尊於後末世城邑聚落所在方處若有善男子廣為他人說此正法者我當與諸眷屬往詣彼法師所密加護之使其精進處師子座勇猛無畏不令諸魔伺得其便我今復以秘密大明當為作護即說大明曰

但馳射他例一 盟契二 目契三 蘇目契四 鉢
羅合 摩哩那合二 你五 畔惹下左 你六 三畔
惹你七 罽哩沙合二 砌引 那你八 昧怛羅合二 嚩
帝末沒提引九
世尊若諸方處有說法師我當於其左右密誦此明結金剛持印而為加護使得正法廣

大流通

尔時三十三天中有一天子名虞鉢迦生天未久來此佛會處虛空中得聞正法見希有事即時雨天曼陀羅華摩訶曼陀羅花等種種妙花及諸廣大殊妙珍寶供養世尊并妙吉祥菩薩及所說法作如是等諸供養已從空而下繞佛三匝頭面著地禮世尊足持真珠鬘五百肘量其鬘復以一切妙寶而為莊嚴奉上世尊作如是言希有世尊今此廣大甚深正法於後末世能與衆生多所饒益若有善男子等於城邑聚落及諸方處受持此法者當知是人從佛所生持佛菩提轉大法

輪

尔時佛告虞鉢迦天子言如汝所說如是如是若後末世有善男子能於城邑聚落及諸方處持此法者我說是人從佛所生持佛菩提轉大法輪

尔時世尊告妙吉祥菩薩摩訶薩言汝當受

持此不思議境界正法又復告言汝當受持此不思議境界正法於後末世廣大流布不令斷絕使諸衆生得大利樂

妙吉祥菩薩白佛言世尊如佛教旨我當奉持如佛教旨我當奉持若佛住世及涅槃後正法所住五百歲中乃至最後法欲滅時以

佛如來所加持力我當護助宣通流布若有善男子等爲人演說此正法時我當往彼人所隱我身相而不出現聽受彼人所說正法如是隨喜展轉稱讚

尔時世尊告尊者阿難言汝當受持此正法門廣大爲人宣布演說阿難若諸衆生受持

讀誦此正法門一四句偈者當知是人決定成就阿耨多羅三藐三菩提果常爲諸佛共所觀察阿難正使有人以十方一切諸佛刹土滿中珍寶供養諸佛所獲福蘊不如有人於此正法發生淨信聽受讀誦而此福蘊無量無邊尔時尊者阿難白佛言世尊此經何

名我當云何奉持佛告阿難是經名爲不思議境界正法亦名普華幢天子所問亦名妙吉祥菩薩遊戲神通亦名如來秘密法印亦名不退轉法門如是受持

佛說此經已妙吉祥等諸大菩薩及普華幢天子乃至世間天人阿脩羅乾闥婆等一切

大衆聞佛所說皆大歡喜信受奉行

佛說大乘不思議神通境界經卷下